

26 SEP 2003

Mahathir-Cenderamata

CENDERAMATA KHAS UNTUK PBB DARIPADA RAKYAT MALAYSIA

Oleh: Salmy Hashim

NEW YORK, 26 Sept (Bernama) -- Rakyat Malaysia pada Khamis menyampaikan kepada Pertubuhan Bangsa-bangsa Bersatu (PBB) sebuah "Tepak Sireh" yang diperbuat daripada emas dan perak, dan bertatahkan batu permata - 46 tahun selepas menjadi anggota badan dunia itu.

Tepak sireh khas itu yang diperbuat dengan tangan dan bergemerlapan di bawah cahaya semulajadi, dipamerkan di tingkat tiga bangunan PBB. Ia diletakkan berdepan dengan satu replika baj yang menawan - juga diperbuat daripada emas - sumbangan Thailand.

Setiap negara anggota boleh menyampaikan cenderamata kepada PBB yang kemudiannya akan dipamerkan dalam bangunan PBB itu.

Tepak sireh itu disampaikan oleh Datuk Seri Dr Mahathir Mohamad kepada Setiausaha Agung PBB Kofi Annan tidak lama sebelum beliau menyampaikan ucapan terakhirnya sebagai Perdana Menteri di Perhimpunan Agung ke 58 PBB (UNGA).

Dr Mahathir menjelaskan kepada Annan akan makna yang tersirat pada cenderamata itu. Pada masa dahulu, tepak sireh menjadi sebahagian daripada kehidupan harian dalam perbualan, rundingan dan pada majlis-majlis penting di istana, kampung dan kediaman orang biasa.

Daun sireh ditawarkan kepada tetamu sebagai pembuka kata. Tepak sireh kekal sehingga hari ini sebagai hiasan tengah dalam majlis-majlis tradisi.

"Tepak sireh oleh itu merupakan lambang penting diplomasi, dialog, persahabatan dan kerjasama," dan Dr Mahathir menambah kata " Inilah apa yang dilambangkan dan harus dipegang oleh PBB semasa waktu yang mencabar."

Tepak sireh itu berdiri atas empat pedang tradisional Melayu lengkap dengan sarungnya menunjukkan hasrat keamanan warga Malaysia dan harapan mereka bagi keamanan yang berkekalan, kata Dr Mahathir.

Annan, dalam menerima cenderamata itu berkata, "tiada lagi mesej yang lebih sesuai atau penting yang boleh dihantar oleh Malaysia kepada dunia dalam waktu-waktu yang mencabar seperti sekarang ini dalam hal ehwal manusia."

"Mesej itu adalah selaras dengan peranan konstruktif dan komited Malaysia sebagai negara anggota PBB - sebagai penyumbang kepada operasi keamanan PBB; dan sebagai suara utama bagi negara-negara membangun dan berkecuali; dan juga sebagai penggalak dialog dan persefahaman di kalangan penduduk dunia," katanya.

Tepak sireh itu diatur atas dulang yang dikelilingi oleh 14 "cembul" mewakili 13 negeri dan Wilayah Persekutuan. Kotak utama pada tengah disokong oleh 4 senjata tradisional - Keris Semenanjung, Keris Tanjung, Parang Ilang dan Tumbuk Lada.

Direkabentuk oleh Henry Bong dan dihasilkan oleh Muzium Galeri Diraja Pucuk Rebung, konsep itu pada asalnya diilhamkan oleh Menteri Luar Datuk Seri Syed Hamid Albar.

-- BERNAMA

SH AHH PR